

یوہ آکا شوانی جموں بے باغ علی طاہر تے محمد مبارک ماہر تیں خبر سُنو۔ پہلاں خاص خاص خبر۔

*1. کل نوی دہلی غا بھارت منڈاپم ور ”پریکشا پہ چرچا“ پروگرام غو اٹھوون شمارو منعقد کیو جا رہیو ہے۔

*2. صدر جمہو ریہ درویدی مُرمو پہلک مہا کُنہہ غو دورو لا وین گی، وے تریوینی سنگم غا مقام ور مقدس ڈبکی لا وین گی۔

*3. ماتا ویشنو دیوی شرائن کٹڑھ مانہہ مزید 2 مہیناں واسطے شراب تے گوشت غا استعمال ور پابندی لا دتی گئی ہے۔

*4. تے محکمہ موسمیات نے آئندہ 3 روز غے دوران جموں کشمیر مانہہ ہلکی با رشاں تے برفبا ری غی پیشنگونی کی ہے۔

خبراں غی تفصیل نال پہلاں باغ علی طاہر۔

Pariksha Pe Charcha

وزیر اعظم نریندرہ مو دی غی طرفوں شروع کیا گیا رابطہ پروگرام ”پریکشا پہ چرچا“ غو اٹھوون شمارو ہلک نوی دہلی غا بھارت منڈاپم ور منعقد ہو رہیو ہے۔ اس پروگرام غے دوران براہ راست وزیر اعظم سنگ گل بات کیا جان واسطے پورا مُلک تیں کل 36 طالب علم چُنیا گیا ایں۔ 5 کروڑ افراد غی شرکت آلا اس سال غا پروگرام نانہہ جن آندولن غی اک مثال غا طور ور پیش کیو جا رہیو ہے، جس مانہہ اجتماعی سطح ور علمی قابلیت حاصل کیا جان واسطے طالب علماں غی حوصلہ افزائی کی جا سکے گی۔ پریکشا پہ چرچا پروگرام سال 2025 ست بصیرت انگیز قسطاں ور مبنی ویگو۔ جن مانہہ زندگی غا بکھ بکھ شعباں سنگ تعلق رکھن آلی معروف شخصیات، طالب علماں غی زندگی تے علم غا بکھ بکھ پہلوواں با رے رہنمائی کریں گی۔ اس پروگرام مانہہ آکاش وانی، دور درشن، سوائم، سوائم پربھا، پی ایم او یو ٹیوب چینل تے تعلیم، اطلاعات و نشریات غی وزارتاں غا سماجی میڈیا چینلاں ور براہ راست نشر تے ٹیلی کا سٹ کیو جا ئے گو۔

Prez Mahakumbh

صدر جمہو ریہ درویدی مُرمو پلک پریاگراج مہا کُنْبھ غو دورو لا ویں گا۔ وے دریائے یمنا تے سرسوتی غا سنگم ”تری وینی سنگم مانہ ڈبکی لا ویں گی۔ وے اکشے وِت تے بڑا ہنومان مندر غو وی دورو لا ویں گی۔ صدر جمہو ریہ جدید ٹیکنالوجی غی مدد سنگ ڈیجیٹل مہا کُنْبھ تجرباتی مرکز مانہ مہا کُنْبھ غی گہرائی غو وی پتو لا ویں گی۔ اس موقعہ ور اُتر پر دیش غا وزیر اعلیٰ یوگی آدتیہ ناتھ وی صدر جمہو ریہ غے ہمراہ موجود ویں گا۔

Training Leather

وزیر اعظم گا دفتر مانہ وزیر مملکت ڈاکٹر جتندر سنگھ نے جموں مانہ جموں کشمیر غی خواتین واسطے چمڑا غی مصنوعات تیار کیا جان با رے تربیت مہیا کران غی خاطر شروع کیا جان آلا صنعتی تربیتی پروگرام نانہ ہری جھنڈی دسی ہے۔ اس تربیتی پروگرام غو مقصد چمڑا غا سیکٹر مانہ ہنر پیدہ کرن غا موقعہ میسر کرانو ہے۔ یوہ پروگرام سی ایس آئی آر انڈین انسٹیٹیوٹ آف انٹی گریشن میڈیسن آئی آئی ایم جموں غی طرفوں سینٹرل الیکٹرانک لمیٹڈ غی مالی معاونت سنگ منعقد کیو جا رہیو ہے۔ اس روزگا ر پیدہ کرن غا پروگرام نانہ عملان غی پہل غی ذمہ داری سینٹرل الیکٹرانک لمیٹڈ غی وے گی۔ جس غے ذریعے اس پروجیکٹ نانہ سی ایس آئی آر، آئی آئی ایم جموں نانہ دتو جا ئے گو۔ اس پروجیکٹ غو عنوان چمڑا غی مصنوعات غا سیکٹر مانہ ”خواتین نانہ ہنر پیدہ کرن تے کا روباری امداد نالے چمڑا غی مصنوعات غی ڈیزائننگ تے ملبوسات تیار کرانو“ رکھیو گیو ہے۔

Guru Ravi Dass Jayanti

آج گورو روی داس جی غو 6 سو 48 ووں جنم دِن اُدھم پور مانہ وی بڑا مذہبی جوش و خروش تے عقیدت سنگ منایو جا رہیو ہے۔ اس سلسلہ مانہ گورو روی داس سبھا غی طرفوں گورو روی داس مندر ایم ایچ تیں اک جلوس وی کڈھیو گیو، جس مانہ بڑی تعداد مانہ عقیدتمندان نے شرکت کی۔ جلوس مانہ شریک عقیدتمند گورو روی داس غی شان مانہ بھجن گاتا سُنیا گیا۔ اس موقعہ ور انتظامیہ غی طرفوں حفاظت غا تگڑا بندوبست کیا گیا تھا۔ اس موقع ور گورو روی داس سبھا اُدھم پور غا صدر رام داس نے گل کرتاں واں کہیو۔ بانٹ۔

Announcement

ریجنل نیوز یونٹ آکا ش وانی جموں غی طرفوں کٹھو عہ ضلع واسطے عارضی نامہ نگار غا پینل غی خاطر درخواست منگی گئی ہیں۔ تجویز کردہ فارم ور یہ درخواست 24 تیں 50 بہراں غی عمر غا ضلع کٹھو عہ غا بسنیک امید وار ریجنل نیوز یونٹ آکا ش وانی جموں ور دے سکیں۔ یہ امید وار ضلع صدر دفتر کٹھو عہ تیں 10 کلو میٹر غا دائرہ غے اندر رہا نش پزیر ہونا چاہیں۔ پی ٹی سی غا امید وار غی خاطر تعلیمی قابلیت پی جی ڈپلومہ یاہ صحافت مانہ ڈگری یاہ فر کسے وی تسلیم شدہ یونیورسٹی تیں گریجویشن غے نال نال 2 بہراں غو صحافت مانہ تجربو ہونو رکھیو

گیو ہے۔ اس توں علاوہ کمپیوٹر تے ورڈ پروسنگ غی جانکاری نالے خبر اکھٹیں کرن آلا آلات غی جانکاری اور الیکٹرانک میڈیا مانہ میڈیا کوریج غو تجربو رکھن آلا اُمید واراں نانہ ترجیح دتی جانیگی۔ خواہشمند اُمید واراں نانہ کہیو گیو ہے جے وے تمام ضروری دستاویزات غے ہمراہ درخواست نیوز ہیڈ، ریجنل نیوز یونٹ آکاش وانی پنج تیرتھی جموں مانہ آئندہ 15 فروری بروز بار توڑی دے سکیں۔ اس سلسلہ مانہ مزید تفصیلی جانکاری غی خاطر مہاری ویب سائٹ

www.newsonair.gov.in

وری رابطو کیو جا سکے۔

مزید خبراں نال محمد مبارک ماہر۔ ور اُس تیں پہلاں یوہ پیغام۔ (یہ خبر تم آکاش وانی جموں تیں سُن رہیا ہیں، تے یہ خبر مہاری ویب سائٹ نیوز آن آئیر ڈاٹ گو ڈاٹ ان وری دستیاب ہیں، اس (تیں یہ خبر مہاری موبائل ایپ تے ڈی ٹی ایچ وری دستیاب ہیں

Prohibition

سب ڈویژنل مجسٹریٹ کٹڑھ نے بھارتیہ ناگرک سرکشا سن ہٹا قانون غی حاصل اختیارات غو استعمال کرتاں واں اپنا دائرہ اختیار غے تحت آن آلا کٹڑھ علاقہ مانہ شراب تے ہر قسم غا گوشت اور آئندہ غا استعمال، قبضہ مانہ رکھن یاہ فروخت کرن ور پابندی لا دتی ہے۔ آکاش وانی جموں غا نمائندہ نے جانکاری دیتاں واں دسیو ہے جے اس سلسلہ مانہ جاری پابندی مانہ مزید 2 مہیناں غی تو سبک کر دتی گئی ہے۔ یاہ پابندی کٹڑھ قصبہ تیں تکونی پہاڑیاں مانہ قائم ماتا ویشنو دیوی گفہ غا 12 کلو میٹر غا رستہ تے اس غا کول کال غا علاقہ مانہ آئندہ 2 مہیناں توڑی جاری رہے گی۔

Mock Drill

جموں کشمیر پولیس غی طرفوں کی گئی عارضی مشقاں نے ہنگامی تیاریاں نانہ باہدو دین با رے کو ششماں غا اک حصہ غا طور ور ڈوڈہ شہر نانہ عارضی طور ور بند کر دتو ہے۔ ضلع انتظامیہ نے مشقاں نانہ معمول غا طور ور دسیو ہے پر اصل ہنگامی صورتحال غے دوران فوری تے موثر رد عمل نانہ یقینی بنانو مچ ضروری ہے۔ مشق غے دوران پولیس نے لاؤڈ اسپیکر غے ذریعے لوکاں نانہ مختصر بند غے با رے آگاہ کیو ہے۔ اس سلسلہ مانہ مقامی بسنیکاں پورا تعاون کاروبار بند کرن تے سڑکاں ور نقل و حرکت نہ کرن با رے یقین دوايو ہے۔ انتظامیہ نے سال 2019 غا کرفیو تے عالمی وباء کو یڈ 19 غا لاک ڈاؤن آروں ضروری دسیو ہے، تانجے شہریاں نانہ مستقبل غی ہنگامی صورتحال غا سلسلہ مانہ بہتر طریقہ سنگ تیار کیو جا سکے۔ اس موقعہ ور بولتاں واں ایڈیشنل ایس پی ڈوڈہ شکیل الرحمان نے اس طرح کہیو۔ بانٹ۔

Winter Festival

بھارتی فوج نے آج ضلع پونچھ غی سرنگوٹ تحصیل مانہہ پیرپنجال سرمائی میلہ غو انعقاد کیو۔ جس مانہہ 16 راشٹریہ رائفل غا کمانڈینگ آفسر کرنل دیوش کمار نے اس عظیم الشان تقریب غو افتتاح کیو۔ یوہ میلو ڈیڑھ مہینہ تک چلے گو۔ جس مانہہ مچ ساری کھیڈاں تے ثقافتی سرگرمیاں غو انعقاد کیو جا نے گو، جس غو مقصد مقامی نوجواناں ناہہ ان کھیڈاں تے ثقافتی سرگرمیاں آلے پا سے راغب کر غے سماجی شراکت داری ناہہ بابدو دینو ہے۔ مذکو رہ میلہ مانہہ افتتاحی تقریب غے دوران کرنل دیوش کمار نے اس میلہ غی اہمیت ور لوہ کہلی۔ اس موقع ورآکاش وانی سنگ گل کرتاں واں سرنگوٹ غا ضلع ترقیا تی کونسل غا رکن سہیل ملک نے اس طرح کہیو۔ بانٹ۔

ACS Education

جموں خطہ مانہہ اعلیٰ تعلیم ناہہ بہتر کرن پا رے کو ششاں غا سلسلہ مانہہ ایڈیشنل چیف سیکریٹری شانت منوے زنانه سرکا ری کالج پریڈ جموں مانہہ خطہ جموں غا کالجاں غا پرنسپل سینگ پہلی بیٹھک غی صدارت کی۔ مذکو رہ بیٹھک مانہہ قومی تعلیمی پالیسی این ای پی غا نفاذ، طلباء غی ذہنی صحت تے کالجاں مانہہ بنیا دی ڈھانچہ پا رے درپیش مشکلاں ور توجہ دتی گئی۔ مذکو رہ سیکریٹری نے اخلاقی تعلیم غی اہمیت اور طالب علماں غی جذباتی بھلائی بہتری غی حمایت ور زور دتو۔ اس موقع ور کالجاں غا پرنسپل نے تعلیمی کامیابیاں پا رے دسیو بھالیو تے نال ہی سی یو ای ٹی تے سمرتھ پو رٹل جیسا مسنلاں ور تشویش غو اظہا ر کیو۔ اس موقع ور ایڈیشنل چیف سیکریٹری نے درپیش مشکلاں غا ازالہ تے جموں کشمیر مانہہ تعلیمی نظام ناہہ بہتر بنان پا رے سانجھی کوششاں ور زور دتو۔

Weather

محکمہ موسمیات نے جموں کشمیر مانہہ اج تیں اگلا 3 تہاڑاں مانہہ ہلکی بارش تے برفباری پا رے پیشنگوئی کی ہے۔ محکمہ نے دسیو ہے جے خطہ غا کجھ اک مقامات ور اج ہلکی بارش اور برفباری ہو سکے۔ وادی کشمیر مانہہ خاص کر 10 تے 11 فروری ناہہ بدل تے برفباری ہون غی زیادہ توقع ہے، جد کہ 12 تیں 14 فروری تک موسم خشک ہون بارے پیشنگوئی کی گئی ہے۔ اس تیں علاوہ آبر آلود موسم غو اک ہو ر سلسلو 15 تے 16 فروری ناہہ ہلکی بارش تے برفباری غا امکان نال وے گو۔ واضع رہ جے اس بہرے ٹھنڈاں غو موسم غیر معمولی رہیو ہے، جس مانہہ ٹھنڈی رات، گرم دن تے بارشاں مانہہ نمایاں کمی واقع ہوئی ہے۔ جموں کشمیر مانہہ جنوری مہینہ مانہہ بارشاں نمایاں کمی دیکھی گئی ہے، جس مانہہ 1 جنوری تیں 29 جنوری تک غا اعدودو شمار مانہہ 87 فیصد کمی واقع ہوئی ہے۔
